

Per via plain ideas

Viafier retica: Il nov Inno Tren

DA GION NUTEGN STGIER / ANR

■ **A partir dad oz è l'Inno Tren, la stanza da sedutas movibla, ina part dal trafic da la Viafier retica. Giudair il mund alpin durant ina sesida da fatschenta è ussa pussaivel. Per quella innovaziun èn vegnids investids 220 000 francs.** La Viafier retica è in travagl zunt innovativ, in manaschi che va cun il temp ed ina fatschenta che vesa en il futur. Er la pli nova purschida, l'Inno Tren, è ina novaziun che vegn segir stimada da blers e che porta en pliras raschuns dapli vita en l'actività da sedutas, sesidas, lavuratori ed autras occurrenz da manaschis ed interpresas.

In anteriur tren dal Glacier Express

L'Inno Tren, quel ha la Viafier retica realisà èn collavuraziun cun la HTW Cuir e cun la firma da tecnologia Zühlke. Contribuì bler a la novaziun da la Viafier retica han cunzunt ils students da la HTW, els ch'han er dà intgins impuls per far l'Inno Tren anc pli attractiv, pli agreabel e pli creativ.

Per realisar quella stanza da sedutas movibla ha la Viafier retica fatg diever d'in vegl tren dal Glacier Express. Quai

sa mussa cunzunt cun avair il char fanestras da panorama nua ch'ins vesa anor, dentant betg anen.

Plaz per fin 15 personas

Renato Fasciati, il directur da la Viafier retica, è persuas ch'il Inno Tren daventa in

product dumandà. Ir tras il Grischun, giudair il mund alpin, saja quai en la Sur-selva, il Grischun central, l'Engiadina ed

il Partenz cun s'occupar cun documents, actas e mappa da scriver, laptops, quai in-spireschia mintga participant da la sesida. En il tren da seduta movibel han plaz fin 15 personas. *Jürg Kessler*, il rector da la HTW Cuir, ha ditg che cun realisar l'intern dal tren sajan il spazi, il carstgaun ed il process stads centrals. *Nicolas Durville*, il CEO da la firma Zühlke, ha ditg ier durant la preschentaziun dal nov Inno Tren che novas ideas vegnian savens grazia al conturn singular e gist quai saja er il cas tar quella stanza da sedutas movibla. Sesidas e lavuratori ch'hajan lieu en in tren portian pli tgunsch ils fritgs duaivels che sedutas ch'hajan lieu en in biro.

Bler è inclus

Far quatter uras diever da la stanza da sedutas movibla custa 1350 francs inclus in'excursiun per tut ils participants dal lavuratori ubain da la sesida. Prender a fit l'Inno Tren per in di a Cuir custa 900 francs e per in mez di èn quai 500 francs. En quels pretschs inclus èn il support e la tgira entras ina hostessa da la Viafier retica, WLAN, material da creatività, artigels da papetaria, flipchart, aua minerala, café e fritgs.

Dapli infurmaziuns ed er reservaziuns sut l'addressa: www.rhb.ch/innotren



Han preschentà ier la pli nova innovaziun da la Viafier retica, l'Inno Tren: **Nicolas Durville**, CEO firma Zühlke, **Renato Fasciati**, directur Viafier retica, e **Jürg Kessler**, rector HTW Cuir (da san.).

FOTO VIAFIER RETICA